

編號 1

姐公个紅棗細寶貝

劉純汝原作

記得對佢略略仔知人我以來，在逐年愈熱个暑假，阿姆總會渡佢轉姐公屋下。因為姐公戴在苗栗个公館客家莊，種有一大片个紅棗園，七、八月仔緊工个時節，阿公个子女都會轉來搵手。

收成趕事个逐朝晨，天正甫甫仔光，姐公、姐婆、阿舅摺姑婆就會戴帽仔、落手袖仔、著長褲、水靴筒……全身包到好勢好勢，攞等大隻、細隻个塑膠桶仔、布袋這兜，出發去園肚摘紅棗哩！見擺，佢總係睡過迄、跣人毋著，就單淨伸著留在屋下搵手擇紅棗个份。分佢印象當深个一擺，係佢十歲該年，打早、天還盲光佢就輕手輕腳跋跣床，恬恬仔著好衫褲，在廳下等姐公佢兜。

姐婆看著佢著下驚：「啊哦，你這隻細嚟仔，日頭都還在該睡，你坐在這，做麼个呢？」

佢講：「分佢跣好無？」

姐婆應佢：「你徑手徑腳就會，棗仔樹、笏了了¹，係分佢刺著，斯會喊阿姆哀唷！大人無閒泊杈，麼人愛搭你！」

顛倒係最惜佢个姐公，笑笑仔講：「毋怕，分佢跣，佢乜盡久無去紅棗園咧，共下來去看姐公个紅棗細寶貝啊！」

「新娘上轎——頭一擺」，分佢跣著哩！一入到園肚，佢就像飛出鳥籠个鳥仔共樣，暢到奈毋得，緊行緊摘、緊食緊行。哇！一把把²个紅棗，啾紅又大粒、精神飽滿；咦，佢聽著樹頂絡食个細鳥仔啾啾滾呢，佢兜鬧熱煎煎个叫聲，唱出一條條好聽个歌仔；噯，細樹極背仰會園等恁生趣个虐毛蟲呢？佢在該蠕蠕動像跳舞樣仔。還有當多毋識看過个細蟲仔，滿哪仔趕來趕去搞等困人尋。「你兜愛細義啊，毋好分棗仔笏刺著也！」看到全無瞞目个佢，好心摺佢兜提醒，噯毋記得自家係來搵手个唷！

對識得過「紅棗王」个姐公來講，紅棗係厥細寶貝，一路里來，花盡多个心思來照顧佢兜，姐公長透講：「人勤地獻寶，人懶地生草。用心照步來做，就會打出品質湛斗个紅棗哩啲！」兩年前，姐公身體無鬆爽，既經無法度去園肚做事咧，現下个紅棗乜較歉收咧，細寶貝可能係日思夜想姐公，噯毋記得愛好好成長哩！

佢想愛摺姐公个紅棗細寶貝深深感謝：你兜串出姐公个歡喜農場，你兜連起歸屋个幸福味緒，你兜還分佢有暢樂个童年回憶。偲兜共下來祝福姐公大寶貝，愛平平安安、康康健健！

¹ 笏了了：音 ned` liau` liau`；刺很多。

² 一把把：音 id` pa` pa`；一串枝一串枝的。

編號 2

佢曉搵手咧

廖惠貞原作

佢在屋下座大，阿姆講：「盡大个愛有好樣。」故所佢輒常帶等老妹共下學習、同大人搵手，阿婆講：「有緣正入共家門，一屋下人愛共心。」故所佢當聽話。

佢生到像大人恁高，毋過佢今年正十空歲仔定定，還係細人仔。屋下个大人有四儕，吾阿公、阿婆、阿爸摺阿姆。佢看世大人歸日仔愛上班賺錢，日日做到兩頭烏，還辛苦哪！細人仔當然愛多學做兜仔事情較好哪！

從細佢就好在灶下看阿姆煮食，佢對一年生開始，就會同大人搵手。阿姆煮菜、佢煮湯，兩儕人歡喜个鼻等香氣，七手八腳、就有好出菜吔；阿爸講佢恁乖，老妹摺佢搭手，佢越學就越快樂！佢也盡好跔阿婆去市場，市場係鬧熱又生趣个所在，做得認識當多東西，尤其係青菜，像苦瓜摺番瓜係愛掛皮煮个，菜瓜摺瓠仔就愛刨皮，芹菜係食莖个，番薯葉、芥蘭菜个葉仔摺莖都做得食，笏瓜仔¹洗淨就食得，蔥仔、蒜仔仰般分，這兜全部都係佢在買菜个時節學著个。

¹ 笏瓜仔：音 ned` gua` e`；小黃瓜。

每日除忒搵做微毛末節个頭路，像：抹地泥、撿摯、收衫褲這兜，佢還會學煮飯。有一擺，吾姆出外，吾婆先愁便，佢就講：「阿婆！毋使愁，當晝佢來煮。」佢同米洗好，放入電鑊仔煮，堵好還有一鑊个爌肉²，就同佢放在瓦斯爐用炆火暖燒來，續等煎卵包、炒一盤薤菜，還煮咧一鑊包粟湯。佢也記得吾姆教過佢个：煮湯愛細義，毋好燒著！佢還有放芫荽仔³來敲香哦，兩下手就喊老妹好搵手排碗筷，過喊阿公、阿婆食飯哩！吾公、吾婆說佢講：「吾慇孫女大哩啲，還會啲！」佢自家也試著已沙鼻！

佢去到學校也會同先生搵手，因為佢係「細先生」。看先生歸日仔無閒泊杈，愛改一堆个字簿仔，故所佢會摺先生搵手，當晝頭就無歇睏。佢拿等紅色个筆，目珠擘金金檢查同學个字簿仔，毋著个位所就用紅筆箍起來，再過請同學改好來，也順續仔教一下毋曉得个同學，恁樣个頭路佢做毋會瘰，因為佢感覺有摺同學搵手著。

有一句話講「多學多得」，正經哦！佢學著當多，感謝吾个世大人分佢機會又信任佢，佢會繼續學習，佢也做得大聲講：「佢會煮飯哩啲！」

² 爌肉：音 kong ngiug`；紅燒肉。

³ 芫荽仔：音 ien` xi` e`；香菜。